



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyon ga Waray
Tuig XXXIX Ihap 21
Nobyembre 7, 2008
www.philippinerevolution.net

Editorial

Korapsyon ha butnga han krisis

Ginurak utro an waray tubtuban nga korapsyon, kaduntan ngan pagmaniobra han rehimen Arroyo ha pagbuto na liwat han daan ngan bag-o nga dagko nga kaso hin korapsyon. Labaw nga nalandaw an isyu yana tungod ha iba-iba nga pamaagi nga ginhihimo hini para mapugngan an imbestigasyon kan anay Undersecretary of Agriculture Jocelyn "Jocjoc" Bolante. Hi Bolante, nangunguna nga opereytor ni Arroyo hadton 2004 ha pagkawat han ₱2.8 bilyones nga pundo han Ginintuang Masaganang Ani in ginpabalik diri pala maiha ha Pilipinas makalabay nga riwahan han US an ginhangyo niya nga *asylum* (pag-ayop) didto.


Waray ginkaibhan an mga maniobra yana han naghahadi nga rehimen ha paghunghong liwat han baba hini ha iba pa nga poyde tumestigos hiunong ha mga krimen nga nadadabihan han pamilya Arroyo. An desperado ngan krudo nga pag-atentar han rehimen Arroyo nga pugngan pagyakan hi Bolante ha Senado nagpapakita hin ura-ura niya nga kahadlok nga mabuksas ha publiko an nadadabihan nira nga mga anomaliya ngan krimen nga seguridad magpapalarab ha kangalas han katawhan.

Pursigido an panalinguha han rehimen Arroyo nga igpabilin nga serrado an mga sekreto han anomaliya

ha pundo han Ginintuang Masaganang Ani labina nga plano nira gamiton utro an sugad nga iskema ha tigapike nga eleksyon ha 2010. Ha proposisyon nga badyet han rehimen para ha 2009, masobra ₱3.3 bilyones an igin-alotaga ni Arroyo para kuno ha panmalit ngan distribusyon ngahaw hin abono. Kaparte ini han ₱7 bilyones nga bag-o nga alokasyon para ha Ginintuang Masaganang Ani—ginhimo mismo an programa nga garatsan nira Arroyo ngan Bolante hadton 2004. Wala-tuo an iba pa nga larang nira Arroyo ngan han iya mga niyu-tiyo para mas pa nga malimas an karikuhan han nasud.

An paggrabe han korapsyon ni Arroyo hini nga urhi nga mga tuig han iya paghahadi kaparte han mga pangandam niya para dugang nga maseguro an pagpabilin niya ha poder lahos ha 2010. Dugang nga nagtikahugot an iya pagkapyot ha poder ha ura-ura nga kabaraka nga pababatonon hiya ha iya mga sala ha katawhan.

Naru-napulo kabilyon kapesos nga pundo an gintitirok ni Arroyo komo pangandam ha aatubangon niya nga mga politikal nga agway kasagubay han panalinguha niya nga magpadayon an iya gahum lahos ha iya presente nga termino. Gagamiton niya ini panmalit hin suporta han mga politiko para ha iskema nga cha-cha (*charter change* o pagbabag-o han konstitusyon) agud tugutan an pagkandidato niya utro komo presidente o primer ministro. Kun diri man gagamiton niya an gidakui nga pundo para maseguro



Mga landaw hini nga isyu...

26 armas nakumpiska,
43 kaswalti han AFP-
PNP
PAYPAY 4

7 detenido nga kasama
ha Quezon, ipinuga han
BHB
PAYPAY 5

Imperyalismo nga US
ilarum ni Obama
PAYPAY 11

nga ha iya pa gihapon an leyaltad han mga magdadaug nga kandidato enkaso madayon pa gihapon sugad han naglabay an eleksyon ha 2010. Kadungan hini, gin-gagamit ni Arroyo ini nga pundo para paliton an leyaltad han mga opisyal han militar ngan pulisya enkaso umabot hiya ha pag-imponer han paghahadi militar kun mapakyas an iya iginduduso nga cha-cha.

Tungod ha nagtitikagrabe yana nga sosyo-ekonomiko nga krisis, kada sentabo nga kawaton ni Arroyo tikang ha pundo han katawhan nagdudugang ha hapdos han nag-iinagurok nga tiyan han nagkukuri nga katawhan. Ha pan-ngawat ni Arroyo hin bilyun-bilyon kapesos, dugang nga nahiluludlod ha kakurian ngan katiniyupi ngan labaw nga nagkakaladkad an kalangot han katawhan. Nagsusulwaka an mga bursa nira Arroyo samtang milyun-milyon an nagugutom, waray tuna nga nauuma, waray iba nga ginpapakabuhian, waray tuhay nga balay nga uulian. Gidamui an magsakit nga diri nakakapalit hin medisina, milyun-milyon nga istudyante an napipiritan umentra ha mga eskoylahan nga ruba kaupay ngan waray mga pasilidad ngan

milyun-milyon pa an diri namanla makaeskoyla tungod ha kapobrihan ngan puros waray lalauman nga kabuwason.

Huhusgaran han kasaysayan an rehimen US-Arroyo komo usa ha pinakadunot nga gobyerno nga ginamit hin poder para maghakin hin dako nga karikuhan ngan manmuy-poy, ha sobra nga destroso ha katawhan.

Diri angay palusuton han katawhan an tanan-nga-gapil nga pagbinuwa, panlimbong ngan pan-ngawat ni Gloria Arroyo. Diri angay tugutan nga lumastar pa hiya ha poder. An ngatanan nga pagbinuwa ngan pagmaniobra ngan an kada minuto nga pagpabilin niya ha poder iya gin-gagamit agud labaw pa nga mandambong ngan hugtan an kadena nga nagapos ha katawhan.

Kinahanglan gamiton han katawhan an ngatanan nga pamalagi agud mapugngan an iba-iba nga iskema ni Arroyo para mapahilawig pa an iya paghahadi. Kinahanglan

padayon nga manalinguha an ngatanan nga demokratiko, patriyotiko ngan kontra-Arroyo nga pwersa nga magkaurusa ha luyo han pag-atentar han Malacañang nga buhagon ngan rumkon hira. Kinahanglan padayon ini nga pagkaurusa para matirok nira an kusog nga magbabagsak kan Arroyo.

Dugang nga napupukaw an katawhan Pilipino ha panginahanglan hin rebolusyunaryo nga pagbungkaras samtang dugang hira nga nalulubong ha kakurian ngan katrasado ha butnga han padayon nga nagtitikagrabe nga sosyo-ekonomiko nga krisis ngan mga krimen han naghahadi nga rehimen. Samtang nagtitikaura-ura an kabangis han rehimen Arroyo, dugang nga nagtitikadig-on an determinasyon han katawhan nga hasugon an dalan han armado nga rebolusyon.

Ha pagpursige han hiluag nga rebolusyunaryo nga kagiusan ilarum han pamumuno han Partido Komunista han Pilipinas (PKP), ngan pagpursige han ngatanan nga mga kontra-imperyalista, kontrapyudal ngan kontrapasista nga pwersa, labaw nga nagkukusog ngan nahiluag an pag-ato han katawhan Pilipino. Waray kasumo an panalinguha han mga rebolusyunaryo, patriyotiko ngan demokratiko nga pwersa ha pag-undong ha interes han katawhan ngan pagpapasulong han ira mga pakigbisog. Padayon nga pakukusgon an mga taktikal nga opensiba han mga armado nga rebolusyunaryo nga pwersa, mga pakigbisog han katawhan ngan iba pa nga pamalagi hin pag-ato agud tapuson an paghahadi ni Arroyo ngan paatubangon hiya ha paghusgar han katawhan.

AB



Tuig XXXIX Ihap 21 Nobyembre 7, 2008

Igin-gagawas an *Ang Bayan* ha yinaknan nga Pilipino, Bisaya, Iloko, Hiligaynon, Waray ngan Ingles.

Mahihimo ini nga i-download tikang ha Philippine Revolution Web Central nga makikita ha:

www.philippinerevolution.net

Nakarawat an *Ang Bayan* hin mga kontribusyon ha porma hin mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton pahayagan. Maaabot kami pinaagi han mga email ha: angbayan@yahoo.com

Gin-uunod

Editorial

- Korapsyon ha butnga han krisis 1
- Panhunghong ha baba ni Bolante 3

Magdinaugon nga TO

- 26 armas nakumpiska ha mga opensiba 4
- 43 aksyon militar han BHB ha Samar 4
- 7 detenido ha Quezon, ipinuga han BHB 5
- Operasyon dis-arma ha Davao Oriental 6

Pagpuga tikang ha kaaway 7

Pan-opisyal nga kurso ha Eastern Visayas 7


Panhihibang han pasista nga estado

- Pan-gigipit ha mga ligal nga aktibista 8
- Target: Mga aktibista ha ST 9
- Mga Moro, biktima han militarisasyon 10

Imperyalismo nga US ilarum ni Obama 11

Balita 12

Iginpublikar an *Ang Bayan* duha kabeses kada bulan han Komite Sentral han Partido Komunista han Pilipinas



Paghunghong han baba ni Bolante

Tungod ha deportasyon han US kan anay Undersecretary of Agriculture Jocelyn "Jocjoc" Bolante hadton Oktubre 28, diri na epektibo an gin-himo hadto han rehimen nga taguon hiya ha nasud o kundi man palusuton hiya gawas ha Pilipinas para makalikay ha imbestigasyon ha mga higante nga kaso hin korapsyon nga gin-aatubang niya. Sugadpaman, waray pa gihapon hunong an rehimen ha mga palusot ngan maniobra.

Hi Bolante an prinsipal nga opereytor ni Arroyo ha pagkurakot ha ₱2.806 bilyones nga pundo han Ginintuang Masaganang Ani nga gin-gamit han kampanya han administrasyon ha eleksyon hadton 2004. Pinaka-kontrobersyal la nga parte hini an ₱728 milyones nga *fertilizer fund* nga putos hin mga anomaliya.

May-ada mando an Senado hadto pa nga 2005 nga igpaaresto hi Bolante, makalabay an iya paurutro nga paglikay nga tumabong ha imbestigasyon han Senado ha kaso. Ginpalusot hiya han rehimen Arroyo pagawas han nasud hadton 2005 ngan inaro hiya hin *asylum* ha US hadton 2006. May-ada klaro nga pag-abat an mayoriya ha Senado nga may-ada sala hi Bolante ngan kinahanglan nala makuha an iya testimonya para maipormal an desisyon ngan masadhan na an kaso.

Waray kahimo han Malacañang nga himuon an ala-Jun Lozada nga pagkatin kan Bolante tungod kay

nakatutok ura-ura an midya ngan publiko ha iya pag-uli. Pero samtang igindidiretso ha St. Luke's Medical Center ha Quezon City, kun anu-ano nala an ginpinsar nga maniobra han rehimen agud diri mahiatubang hi Bolante ha Senado ngan kun sugad mahunghungan hiya.

Para mag-iha pa hiya ha ospital, kun anu-ano nala an iginpasangil nga sakit ni Bolante ha luyo han ginsesering han iya *medical buletin* nga istable ngan normal an iya kondisyon. Igindiretso hi Bolante ha ospital kahuman ini magreklamo nga masuol an dughan han makalanding na an edro ha Manila International Airport. Naiiba ha ordinaryo nga pasyente, waray hiya igdiretso ha *emergency room*, lugod ha usa nga marahalon nga kwarto han St. Luke's kun diin may-ada na naghuhulat nga mga doktor. Iginmando ni Dr. Ramon Saavedra, an doktor ni Bolante,

nga diri hiya makarawat hin mga bisita.

Kadungan hini, ginpaapura ni Bolante ha Supreme Court nga aprubahan an petisyon para ha *temporary restraining order* (TRO) agud pugngan an Senate Sergeant-at-Arms nga arestuhon hiya ngan paatubangon ha Senado. Hini nga Nobyembre 3 ginbawi han abogado ni Bolante an petisyon para ha TRO tungod kay ha kamatuoran naaresto na han Senado an iya kliyente.

Samtang, gin-abrihan han Department of Justice an imbestigasyon han Office of the Ombudsman ha kaso han pan-ngawat ha ₱432 milyones nga pundo pan-abono nga iginsalawad han mamarahayag nga hi Marlene Esperat kontra kan Bolante. Kahuman ini pabay-i nga kaso hin tulo katuig ni Ombudsman Merceditas Gutierrez, sangkay han mga Arroyo.

An tigdaay nga pag-abri hini nga imbestigasyon an gin-gagamit yana nga pasasngilan agud pugngan an Senado ha kalugaringon hini nga imbestigasyon. Sumala kanda Sen. Edgardo Angara ngan Juan Miguel Zubiri, duha ha pinaka-masinugtanon nga tagdepensa han mga Arroyo, magtitinipa la kuno an Senado ngan an Ombudsman kun igpupursige pa han Blue Ribbon Committee an imbestigasyon. Sumala kan Gloria Arroyo, nagpapasikat la an mga senador ngan kongresista nga nagpupursige nga abrihan utro an imbestigasyon ha *fertilizer fund scam* ngan iba pa nga mga iskandalo nga dabi an Malacañang.

Hini nga urhi, nagsalawad hin petisyon para ha *writ of habeas corpus* hi Owen Bolante, anak ni Bolante, ha Court of Appeals. Ginlalauman han mga Bolante ngan barkadahan nira Arroyo nga mapabor ha administrasyon an nasering nga husgado, sugad han nahitabo han damo nga desisyon hini han nakalabay. AB



26 armas nakumpiska, 43 kaswalti nahiaguman han AFP-PNP

Baynte kwatro nga magbakod nga riple ngan duha nga pistola an nakumpiska han mga Pula nga mangaraway han Bagong Hukbong Bayan (BHB) ha magkaburublag nga taktikal nga opensiba nga iginlansar han mga gerilya tikang Oktubre 4 tubtub Nobyembre 5. Baynte tres nga elemento han Armed Forces of the Philippines (AFP), Philippine National Police (PNP) ngan CAFGU an namatay ngan 20 an nasamaran ha mga agway.

Nobyembre 5. Usa nga elemento han CAFGU an namatay han isnaypon hiya han mga Pula nga mangaraway gawas han ira detatsment ha Sityo Balagonon, Barangay Managa, Bansalan, Davao del Sur.

Nobyembre 3. Usa nga sundalo han 57th IB an nasamaran ha usa nga engkwentro giutan han mga Pula nga mangaraway han BHB ngan militar ha Sityo Talahek, Barangay Bacong, Tuluhan, North Cotabato.

Nobyembre 1. Duha naman nga elemento han CAFGU an nasamad han atakihon han Pula nga hukbo an detatsment han militar ha Barangay Mararag, Marihatag, Surigao del Sur.

Oktubre 29. Unom nga riple nga M16 ngan usa nga kalibre .38 nga rebolber an nakumpiska han mga Pula nga mangaraway han BHB ha Jose C. Aquino Rubber Company, usa nga plantasyon han goma ha Barangay Sta. Teresita, Bayugan City, Agusan del Sur. Kadungan hini, ginkumpiska han mga gerilya an M16 han usa nga sarhento han AFP ha usa nga tsekpoynt nga gintukod han mga gerilya ha Barangay San Jose, Prosperidad, Agusan del Sur.

Oktubre 25. Dise-says nga magbakod nga armas an nakumpiska han BHB ngan milisya han katawhan han atakihon nira an detatsment han CAFGU ilarum han 37th IB nga aada ha sakob han plantasyon han Dole-Stanfilco ha Barangay Luna Sur, Makilala, North Cotabato. Usa nga elemento han CAFGU an namatay ngan usa nga sarhento ngan tulo pa nga elemento

han CAFGU an nasamad.

Gin-ambus liwat han usa pa nga grupo han mga Pula nga mangaraway an mga sundalo han 57th IB tikang ha Barangay Luna Norte nga magreinpors kunta ha ginreyd nga detatsment.

Sumala kan Ka Dencio Madrigal, tagapagyakan han Valentin Palamine Command han BHB ha Far South Mindanao, an nasering nga reyde amo in aksyon pagsirot ha Stanfilco ha panlupot hini hin tuna ha gudti nga parag-uma ngan pagmaltrato ha mga trabahador hini. Ha presente, masobra na 30,000 kaektarya an kahiluagon han mga plantasyon hin

saging ngan pinya han Dole-Stanfilco ha rehiyon.

Antes hini ginpahimatngunan na an panlupot han tuna ngan manmati ha mga araba ngan hingyap han katawhan. Pero imbes nga panmatian an reklamo han mulupyo, dugang pa nga nagin agresibo ngan pasista an pagtratar han Dole-Stanfilco ha mga parag-uma ngan trabahador. Gindugngan pa hini an tawuhan han detatsment ngan ginpakusog ngan ginpaagsub an mga operasyon militar ha plantasyon.

Oktubre 25. Usa nga sundalo han 66th IB an nasamaran han ambuson han mga gerilya han BHB an trak nga sinasakyan han mga sundalo ha Barangay Olaycon, Monkayo, Compostela Valley. Antes ini, usa nga sundalo an namatay han atakihon han mga gerilya han BHB an detatsment han Special Forces Battalion han Philippine Army ha Barangay Canidkid, Montevista, Compostela Valley.

Oktubre 24. Walo nga sundalo an namatay, kaupod an pinuno nga

43 aksyon militar, nahilansar han BHB ha Samar

SAYSENTA y noybe nga elemento han kaaway an namatay ha sunud-sunod nga mga aksyon militar nga iginlansar han Bagong Hukbong Bayan (BHB) ha isla han Samar tikang Enero tubtub syahan nga semana han Setyembre. Baynte singko nga elemento han kaaway an nasamaran ha nasering nga mga agway samtang lima nga Pula nga mangaraway an nagin martir. Kinse nga magbakod nga kalibre hin armas an nakumpiska han BHB.

Sumala ha patikang nga rekord han Regional Operations Command han BHB ha rehiyon, tikang Enero tubtub Setyembre 6 naka-paglansar an BHB ha isla hin 43 nga aksyon militar ha mga probinsya han Samar, Northern Samar ngan Eastern Samar. Ginkokomponer ini hin usa nga reyde, lima nga ambus, 29 nga isnayping/harassment nga operasyon, pito nga *special operation* ngan usa nga pagdis-arma. Nakaaslang ngan naungbawan han BHB an unom nga dependensiba ngan lima nga engkwentro.

Ha 43 nga aksyon militar, 24 an nahitabo ha Samar, 15 ha Northern Samar ngan upat ha Eastern Samar.

Iginlalansar han BHB an padayon nga mga aksyon militar komo kaparte han kampanya agud pakyason an pangangatake ha isla han Oplan Bantay Laya 2.

AB



opisyal nira nga tinyente, han ambuson han mga Pula nga mangaraway han BHB an nagpapatrolya nga tropa han 66th IB ha Barangay Manurigao, New Bataan, Compostela Valley.

Oktubre 23. Usa nga elemento han CAFGU an namatay ngan upat pa an nasamaran han atakihon han mga Pula nga mangaraway an detatsment han CAFGU ilarum han 72nd

IB ha Paquibato District, Davao City.

Oktubre 23. Walo nga sundalo an namatay ngan tulo pa an nasamaran han pauranan hin bala han mga Pula nga mangaraway han Nerissa San Juan Command (NSJC) han BHB-Catanduanes an payag nga gin-iis-tambayan nira. Sumala ha report ni Ka Theresa Magtanggol, taga-pagyakan han NSJC, ginsingabot han

mga kasama an pagal na nga mga tropa han Philippine Army ngan CAFGU nga nanmamahuway ha usa nga bakante nga payag ha Barangay Hilawan, San Andres, Catanduanes. Pira na kaadlaw nga ginlalasurbo han kaaway an magkasarapit nga barangay han Tibang, Barihay ngan Hilawan samtang ginmomonitor naman hira han mga gerilya. Ha kahadlok nga mahilapid liwat hira han mga bala, nagdadlagan tipahirayo ha lugar han engkwentro an usa pa nga iskwad han militar nga napahoway liwat ha apike la nga lugar.

Oktubre 19. Usa nga abusado nga pulis an ginkumpiskahan han mga Pula nga gerilya hin kalibre .45 nga pistola ngan usa nga riple nga M14 ha merkado han Escalante City, Negros Occidental.

Oktubre 13. Usa nga elemento han CAFGU an nasamaran han atakihon han mga gerilya han BHB an detatsment han 72nd IB ha Sityo Bukobuko sa Anay, Barangay King-king-Poblacion, Pantukan, Compostela Valley.

Oktubre 13. Duha nga sundalo an namatay han ambuson han mga Pula nga mangaraway an usa ka-trak nga militar ha Talaingod, Davao del Norte. Antes ini, usa nga elemento han CAFGU an namatay han atakihon han BHB an detatsment han 72nd IB ha Barangay Palma Gil ha nasinging gihapon nga bungto.

Usa pa nga elemento han CAFGU an nasamad han pabuthan han mga gerilya an ginkombinar nga pwersa han 72nd IB ngan CAFGU ha Sityo Likupon, Barangay Sanghay, Mati, Davao Oriental.

Oktubre 4. Tulo nga sundalo han 29th IB an nasamaran han ambuson han mga Pula nga gerilya an ira komboy ha Sityo Kapihan, Barangay Concepcion, Valencia City, Bukidnon.

Waray nahireport nga mga kaswalti ha gapil han mga Pula nga mangaraway hini ngatanan nga mga taktikal nga opensiba.

7 nga detenido nga kasama, ipinuga han BHB ha Quezon

WARAY buto nga ginreyd han mga Pula nga gerilya han Apolonio Mendoza Command (BHB-Quezon) hini nga Oktubre 25 an Quezon Provincial Jail ha Lucena City ngan ipinuga an pito nga kasama nga nakadetenir didto. Naipatuman an reyd sakob la hin dyes minutos.

Para makasulod ha prisuhan, nagpasangil an mga Pula nga mangaraway nga mga elemento han Special Weapons And Tactics (SWAT) ngan Philippine Drug Enforcement Agency (PDEA) nga mayada kukuhaon nga priso. Igintayming nira an pag-atake panahon han pagsaliwan han gwardya. Samtang tipagawas an tipauli na nga mga gwardya, nagbantay naman an mga Pula nga gerilya ha garawsan.

Dayon nira gintagaan, ginpadapa ngan ginkumpiskahan hin lima nga rebolber an mga gwardya antes hira kandaduhan ha prisuhan kaupod han iba pa nga gwardya. Usa nga *private security guard* an nag-atentar magreinpors tikang ha kasapit nga bilding pero ginblakan hiya han mga Pula nga mangaraway, ginkumpiska an iya *shotgun* ngan igintimpo hiya ha nahiuna na nga ginpriso nga mga gwardya.

Sakay han upat nga *van*, dayon inatras ha magkaiba nga direksyon an mga gerilya kahuman an madinaugon nga pagsalbar. Duha nga pulis an nasamaran han ulangon nira an mga gerilya nga sakay han usa ha mga *van* ha usa nga tsekpoynit ha Barangay Iyam, Lucena City. Gin-itsahan hin granada han mga Pula nga mangaraway an mga pulis antes magpadayon ha pamalagiw.

Iginpatuman ini nga maungod nga operasyon han BHB ha sentro nga parte han Lucena City kun diin mahiaagian liwat an Quezon Convention Center, Regional Trial Court, Philippine National Red Cross ngan an kapitolyo ha probinsya. Apike liwat an Quezon Provincial Jail ha Camp Guillermo Nakar, hedkwarters han Southern Luzon Command.

Usa kabulan nga ginsubaybayan han mga gerilya an gios han kaaway antes igpatuman an operasyon. Pito nga pistola ngan usa nga *shotgun* an ira nakumpiska hini nga ispesyal nga operasyon.

Ikaduha na ini nga higayon nga pagpapuga ha mga detenido politikal ha Southern Tagalog. Hadton Enero 14, 2006, ipinuga liwat han mga Pula nga mangaraway han Edgardo Dagle Command an siyam nga gerilya han BHB nga nakadetenir ha Batangas Provincial Jail ha Batangas City.

AB



Operasyon pagdis-arma ha Davao Oriental Provincial Jail

Iginbasar ini nga artikulo ha sumat-koresponse tikang ha mga kasama ha 3rd Pulang Bagani Command han BHB ha Southern Mindanao.

Maungod liwat an iginlansar nga operasyon pagdis-arma han mga Pula nga mangaraway ha Davao Oriental Provincial Jail ha Mati City hadton Mayo 19. Tikang an mga gerilya ha 3rd Pulang Bagani Company, kaupod an tag-usa kaiskwad han Front 2 ngan Front 27.

Sakob hin sumobra-kumulang 15 minutos, nasulod han mga Pula nga mangaraway an *provincial jail* nga pira la ka-kilometro an distansya ha *city hall* han Mati. Nakumpiska nira an duha nga M16, usa nga M14, duha nga Garand, tulo nga karbin, duha nga *shotgun*, duha nga 9 mm nga pistola, usa nga .45, usa nga .357 ngan iba-iba nga bala. Nakakumpiska liwat an mga gerilya hin mga magasin, 12 nga posas, usa nga *base radio* ngan mga *hand-held radio*.

Waray kalibutan an mga gwardya han *provincial jail* nga mga gerilya han BHB an mga nakayuniporme nga sakay han duha nga trak ngan usa nga *van*. Gindara dayon han *strike squad* han BHB an mga gwardya ha *gate* tipasulod ha opisina han *jail warden* samtang duha pa nga tim han mga gerilya an kinadto ha *tower* han *guard house*, ha lugar nga gin-iistambayan han mga gwardya ngan ha usa pa nga *tower* katakip han *armori*. An usa pa nga iskwad nakadto ha gawas ngan nag-oobserbar ha gios han mga gwardya.

"Armas lang among tuyo." (Armas la an amon tuyo). Ini an ginyakan han mga gerilya kahuman nira magpakilala nga mga gerilya han BHB ngan magdeklarar han pagdidis-arma. Natigdaan an mga gwardya. Ha sobra nga kahadlok waray na hira nahimo kundi ighatag an katin nira nga mga

shotgun. Waray liwat makagkiwa an *jail warden*.

Samtang iginpapatuman an pagdis-arma, may-ada mga priso nga nagpahayag hin pagpasalamat tungod kay subay ha ira, nasulod gihapon an nasering nga prisuhan nga bantugan ha korapsyon ngan natagan hin leksyon an mga abusado nga gwardya. May-ada pira nga priso nga kriminal nga naghangyo nga buhian hira, pero tungod kay nagahasog an mga Pula nga ma-

ngaraway ha prinsipyo han rebolusyunaryo nga hustisya ngan diri ha yano la nga pagbuhi han hinoman nga priso, waray nira sunda an nasering nga hangyo. Sugadpaman, pag-atras na han mga kasama, may-ada usa nga priso nga ginuliat hin "Mabuhay an NPA! Mabuhay an rebolusyon!"

Nakaabot ha PNP an report hinonong ha reyd pero waray ginhimo an mga pulis kundi ulangon an kalsada tipakadto ha ira hedkwarters. Sering han mga bombero nga nakabase liwat ha apike, magupay la kuno umatake ha litson an mga pulis, pero kun gin-aatake na han kaaway diri na nagresponde.

Marayhak kaupay an masa han makit-an nira an mga kasama kahuman han taktikal nga opensiba tungod kay waray nakarag nga bala ngan waray kinabuhi nga iginhalad ha ranggo han mga kasama. **AB**



Pagpuga tikang ha kaaway

"Bug-os na an akon hunahuna hiton nga adlaw nga diri ako ma-padakop nga buhi ha mga kaaway ngan nakasilsil na ha akon hunahuna nga andam ako mamatay agud la makapuga!"

Ini an ginsering ni Kasamang Don, usa nga Pula nga mangaraway ha usa nga probinsya ha Southern Tagalog nga natalwas ha kamot han kaaway makalabay an 17 diyas nga kadakop.

Nadakop hira Ka Don ngan duha pa nga mangaraway hadton Setyembre ha butnga han pagpatuman nira han buruhaton paniktik komo pangandam ha usa nga taktikal nga opensiba.

Han dakpon hira ngan dad-on ha kampo han militar dayon hira iginpailarum ha saykolohikal nga tortyur. Gintarhug hira nga hiaamong an ira pamilya kun diri hira magkooperar ha kaaway. Waray ilob an iya kaupod ha sugad nga panarhug ngan napiritan maghatag impormasyon ha kaaway. Pero hi Ka Don nagin madig-on ngan waray ungay ha kaaway.

Ginproybahan liwat han kaaway nga tanyagan hi Ka Don hin dako


nga kwarta kun igtututdo niya an iba pa nga kaurupod. Waray ini dumulot ha iya.

Hadton ika-15 diyas na nga kadetenir, nagplano na hi Ka Don nga pumuga ha kampo. Una niya nga gintestingan an umagi ha purtahan han ira prisuhan ngan sumalisi pero may-ada didto nakapwesto nga kaaway hiton nga adlaw. Kinabuwasan naman nahituman nga may-ada nagbabantay nga sundalo ha palibot. Han sinunod pa nga adlaw nakakita hiya hin higayon han malip-atan niya nga nag-iirignom an mga sundalo.

Sinarit la hiya ha iya igkasi-priso nga kukuhaon niya an

iya mga dugnit nga ginpalaypay. Pero pakakuha niya han mga dugnit dayon niya ini ginputos, dungan pagdalagan tipagawas ha prisuhan.

Pakagawas niya, kinahanglan pa niya luy-on an mga *barbed wire* nga nakapalibot ha detatsment ngan an mga dagko nga suga ha sulod han kampo. Haros baynte kadhoble hin *barbed wire* an iya linusutan. Nagkasasamad hiya samtang nagmamalaeskapo ha haros



Pan-opisyal nga kurso han BHB ha Eastern Visayas, nasulong

Usa na kagatos nga opisyal ngan kadre han Partido ngan Bagong Hukbong Bayan (BHB) ha Eastern Visayas an nakatapos hin ispesyal nga kurso nga pagpahira pan-opisyal tikang abrihan han Efren Martires Command han BHB an eskoylahan politiko-militar hini hadton Disyembre 2007.

Kaparte han ispesyal nga kurso an pag-aram han mga balaud han gerra ha kabug-usan, mga leksyon tikang ha gerilya nga pakiggerra ha China ngan Vietnam, mga partikular nga kinaiya han gerra han katawhan ha Pilipinas ngan mga leksyon tikang ha eksperyensya han gerilya nga pakiggerra ha rehiyon. Gindun-an liwat han kurso an pagdirihir han gerra ha taktikal nga lebel (pareho han usa nga aksyon militar) ngan operasyunal nga lebel (pareho han serye han mga aksyon militar ha mas hiluag nga lupgop ngan panahon).

Ha teoritikal nga mga pag-aram, ginkokombinar an lektura ngan mga *workshop* ngan pag-aram han mga pinili nga eksperyensya o *case study*. Ginhimo liwat an pira nga *military exercise* ngan *drill* para magkamay-ada istandardisasyon ha pagpatuman hini han mga opisyal ha kada tagsa nira nga yunit o erya. Iginsisil-at an treyning ha mga opisyal ha istap subay ha panginahanglan, sugad han mga *crash course* ha buruhaton paniktik ngan komunikasyon. May-ada liwat partikular nga treyning ha mga opisyal pampolitika ha iskwad ngan platun.

Ha lima nga bats nga nakagtapos na hin mga kurso ha eskoylahan, inabot hin unom tubtub napulo kaadlaw an mga pagpahira. Sumala ha mga nagpakatapos, signipikante an nahidugang ha ira kompyansa ngan kahibaruan ha pamumuno ngan pagdirihir han mga agway ngan kampanya militar. **AB**

usa kaektarya nga kahiluagon han kampo.

Pakagawas niya ha detachment nagbaktas hiya ha haywey agud hingadto ha mga baryo nga iya nahibabaruan. May-ada higayon nga iginkahitapo hiya hin mga sundalo, sanglit piniliw la hiya para diri makilala. Inabot na hin tulo kaoras an iya pagbinaktas antes hiya umabot ha usa nga baryo kun diin maaram hiya nga may-ada makakabulig ha iya.

Kaagahon na hiya inabot ha baryo. Giuhawi na hiya ngan nangungurog ha hagkot ngan pagal ha kahirayo han iya ginbaktas. Kinatok hiya ha usa nga payag ngan han abrihan hiya nagpakilala hiya nga mangaraway han BHB. Igin-esplikar niya ha tagbalay nga pinuga hiya ha kampo ngan nangangaro hiya hin bulig nga makasumpay ha Hukbo.

Han una nabaraka an tagbalay ngan nagruhaduha pagbulig. Pero ginpaabutan hiya han mga Pula nga mangaraway nga nahituman nga nakada liwat ha baryo nga asikasuhon hi Ka Don. Dayon naman niya ginpakaon ngan ginpakaturog an kasama.

Waray pag-iha inabot an usa nga tim han mga Pula nga mangaraway agud kaestoryahon hi Ka Don. Gin-adman han pamunuan han yunit an iginreport nga resulta han interbyu kan Ka Don ngan nakombinsir hira nga ungod an iya asoy. Pagkagab-i iginpakuha na hiya ngan igin-upod hiya utro ha yunit.

Darayawon an determinasyon ni Ka Don nga magpakadig-on samtang nakadto ha kamot han kaaway ngan an iya pino nga pagplano nga pumuga. Mapupurutan ini hin leksyon para ha hin-o man nga kasama nga mahimutang ha sugad nga sitwasyon nga magin maungod ngan magkamay-ada madig-on nga hunahuna nga atubangon an sugad nga higayon. AB

Pan-gigipit ha mga ligal nga aktibista, nasamwak

Iligal nga pag-aresto ha mga personahe han ligal nga demokratiko nga kagiusan ngan pagsalawad hin mga hinimu-himo nga kriminal nga kaso kontra ha ira an pinakalandaw ha mga kaso han pagtala-pas ha tawhanon nga katungod nga nakalap han *Ang Bayan*.

Nobyembre 6. Ginpurusil tub-tub mamatay han mga lalaki nga sakay han upat nga motorsiklo hi Danny Qualbar, *municipal coordinator* han Bayan Muna ha Compostela, Compostela Valley. Tipauli hadto hi Qualbar ha iya balay han ambuson hiya ha bungto han Osmeña ha mao liwat nga probinsya dapit alas-5:30 han kulop.

Nobyembre 6. Gin-atentaran pagpatay hi Arnold Cerdo, bise presidente han Sensuous Union Labor Organization ngan istap han Cabuyao Workers Alliance. Kaestorya hadto ni Cerdo an iya bayaw ha iya balay ha Riverside, Calamba City dapit alas-9:30 han gab-i han pagpupsilon hira han duha nga lalaki nga nakabonet. Ibos maigo han bala an nawong ni Cerdo.

Nobyembre 4. Iginbasura han korte an petisyon para ha *writ of amparo* han pamilya ni Mary Grace Delicano, membro han Gabriela nga iligal nga gin-aresto hadton Setyembre ha Bacolod City. Ginhimo ini ha luyo han iregularidad ha pagkakaaresto han PNP kan Delicano. Nakaplastar ha mandamyento de aresto nga gin-gamit ha pagdakop kan Delicano nga para ini ha usa nga may-ada alyas nga "Kim" nga akusado hin pan-ngawat kasumpay han usa nga reyd han Bagong Hukbong Bayan (BHB) ha Escalante, Negros Occidental hadton Marso 2005 kun diin nakakumpiska an BHB hin siyam nga armas. Waray anuman nga pagdabi ha ngaran ni Delicano ha mandamyento. Ngan dida nala ginpaamyendar

han pulisya ha korte an mandamyento nga hi Delicano ngan hi "Kim" in uusa kuno katapos an pagkaaresto kan Delicano.

Oktubre 31. Gin-atentaran pagpugong ni Lt. Col. Manuel Sequitin, hepe han 66th IB an pag-ebakwet han sumobra-kumulang 300 nga pamilya tikang ha Barangay Andap, New Bataan, Compostela Valley hadton Oktubre 31 ha luyo han peligro ha ira kinabuhi resulta han mga operasyon militar ha ira lugar. Tikadto ha sentro han New Bataan an mga sibilyan han pugngan hira han militar nga nagsering nga ha Sityo Mother of Perpetual Help na la hira umestar, bisan kun hirani ini ha lugar han mga gin-agwayan han militar ngan BHB. Nahiinsister pa gihapon han mga sibilyan an pagdiretso ha poblasyon, kun diin ginhimo nga temporaryo nga *evacuation center* an New Bataan Gym. Inestar an mga sibilyan ha poblasyon han New Bataan tubtub Nobyembre 1. Resulta han serye han mga operasyon militar, iginbutang ha *state of calamity* han meyor han New Bataan an Barangay Andap ngan kasapit nga Barangay Manurigao.

Oktubre 31. Biktima han harassment an mamarahayag nga hi Loreto Rosario, reporter han dxMS, han magreport hiya hiunong ha pagkasunog han Field Supply Support Unit han AFP nga aada ha sulod han Camp Siongco ha Datu Odin Sinsuat, Shariff Kabunsuan. Sumala kan Rosario, ginsitar hiya ni Col. John Oswald Bucu, kumander han

Camp Siongco, ginkumpiska an iya *press card* ngan mga *cellphone* ngan ginbansagan nga makilalabtanon.

Oktubre 30. Ginsikmit han ginkombinar nga mga elemento han Caloocan Police ngan Intelligence Service of the AFP hi Norberto Murillo Sr., 52 anyos, ha iya balay ha Camarin, Caloocan City. Hi Murillo, nga ginakusaran nga opisyal han Partido Komunista han Pilipinas (PKP) iligal nga gindakop subay ha hinimu-himo nga kaso han pagpatay kasumpay han nahitabo kuno nga purgahan ha Hilongos, Leyte hadton 1985.

Oktubre 24. Hininu-himo nga kaso nga pagpatay ngan pan-ngawat an gin-gamit nga daitlanan para arestuhon an mag-asawa nga hi Margie Lupo Navia ngan Donato Palo ha Barangay Bolo, Labrador, Pangasinan. Hira Navia ngan Palo, nga gin-akusaran nga mga opisyal han PKP ha Quezon gin-aresto han mga pulis han Pangasinan samtang tikadto ha balay han ira mga kaurup-

dan. Gindara hira ha hedkwarters han 3rd Intelligence Service Unit han Philippine Army ha Tarlac.

Oktubre 13. Usa nga lalaki an grabe nga nasamaran katapos hiya maigo han *shrapnel* tikang ha M203 nga ginpabuto han mga sundalo ha Barangay Sanghay, Mati, Davao Oriental. Nagbabantay hadto ha iya tindahan hi Isidro Gerona, 60 anyos, han magkaengkentro an BHB ngan mga elemento han 72nd IB ha hirani. Nagdadlagan an pamilya Gerona para makalikay ha bubtuhay kundi nahibilin an ira tatay. Ginbalikan ini han iya anak katapos mabati an pagbuto han granada tikang ha M203 ha ira balay. Nakita niya nga duguon an iya tatay ngan patay an ira ayam tungod ha igo han *shrapnel*. Ruba liwat an ira lamesa nga kaunan. Sumala ha anak han biktima, nagpadayon an waray wantas nga pagpapabuto han mga sundalo bisan kun maiha na nga nakagikan an mga gerilya han BHB. AB

Target: Mga aktibista ha Southern Tagalog

Naatubang yana ha grabe nga kampanya ha panmumuyopoy an mga lider-masa ngan aktibista han dayag nga demokratiko nga kaguisan ha Southern Tagalog. Kwarenta nga lider ngan membro han mga progresibo nga organisasyon ha rehiyon an ginsalawdan han rehi-men Arroyo hin mga hinimu-himo nga kriminal nga kaso. Akusado an baynte syete ha ira ha pagsunog han Globe Telecommunications *cell site* ha Lemery, Batangas hadton Agosto.

Samtang, 17 ha mga akusado ha kaso han Globe an ginsalawdan liwat hin kaso nga *murder* kasumpay han usa nga ambus han Bagong Hukbong Bayan ha mga elemento han PNP Regional Mobile Group ha Puerto Galera, Oriental Mindoro hadton Marso 3, 2006 kun diin duha nga pulis an namatay ngan tulo an nasamaran. Sitenta e dos katawo an kabug-usan nga ihap han mga akusado ha kaso ha Mindoro Oriental, ngan 30 ha ira in mga dayag nga lider-masa ngan aktibista.

Patag-usa na yana nga ginsisikmit an mga akusado hiunong hini nga mga kaso.

Pinaka-prominente nga biktima hi Atty. Remigio Saladero, pinuno nga abogado han KMU. Iligal hiya nga gin-aresto han ginkombinar nga mga elemento han Antipolo


Police ngan Military Intelligence Group 4A han ISAFP ha iya panimalay ha Antipolo City hadton Oktubre 23 ngan gindara kinabuwasan ha Calapan City, Mindoro Oriental para ha pagbista han hinimu-himo nga kaso nga iginsalawad kontra ha iya. Usa liwat hi Saladero ha mga akusado han *arson* kasumpay han pagsunog ha *cell site* han Globe Telecommunications.

Hini naman nga Nobyembre 3 gin-aresto hi Rogelio Galit, tagapagayakan han Kalipunan ng mga Magsasaka sa Kabite (Kamagsasaka-Ka) ha iya balay ha Silang, Cavite kasumpay han kaso ha Oriental Mindoro. Usa na katuig nga

nakaraptay hi Galit ha sakit nga *diabetes* ngan nakatalaan nga operahan han sikmiton hiya han 15 nga elemento han Cavite PNP ngan *regional intelligence*. Kinabuwasan gindara liwat hiya ha *provincial jail* ha Calapan, kun diin nakadetiner na liwat an tulo pa niya nga pareho akusado nga hira Attorney Saladero, Nestor San Jose ngan Crispin Zapanta. Gin-aresto hi Zapanta, *coordinator* han Bayan Muna ha Antipolo City hadton Oktubre 27.

Hugot nga ginkondenar han iba-iba nga progresibo nga organisasyon an ginhihimo nga pan-gigipit ha

mga lider-masa ngan aktibista han Southern Tagalog. Sering ni Bayani Cambronero, *regional coordinator* han Bayan Muna-Southern Tagalog, an kampanya nga panmumuyopoy kaparte han pagkriminalisa ha mga aktibista. "Ginsasalawdan kami han gobyerno Arroyo hin mga hinimu-himo nga kaso tungod ha kapakyasan hini nga pamingawon kami pinaagi han ekstrahudisyal nga panmatay," sering niya. AB





Nagtitikadamo nga sibilyan Moro an biktima han militarisasyon

Nagtitikadamo an ihap han mga sibilyan nga Moro nga nabibiktima han magbangis nga operasyon militar han Armed Forces of the Philippines (AFP) ha pira nga parte han Mindanao.

Sumala ha report han International Committee of the Red Cross (ICRC) hadton Oktubre 29, ha mga *evacuation center* ha Datu Piang, Maguindanao pa la in may-ada na 55,000 nga indibidwal nga nag-ebakwet ha kada tagsa nira nga mga panimalay, tikang ha 35,000 katawo hadton Agosto. Tikang Agosto tubtub ikatulo nga semana han Oktubre, inabot na ha 127,164 kapamilya o 611,753 nga indibidwal an naapektaran han mga agway giutan han MILF ngan AFP ha mga probinsya han Lanao del Norte, Lanao del Sur, Sultan Kudarat ngan Maguindanao.

Samwak an kalisang. Nagdudurot na hin iba-iba nga problema ha panhunahuna ha mga ebakwet an grabe nga militarisasyon. Sumala ha imbestigasyon han Commission on Human Rights (CHR) hini nga Oktubre, samwak an mga pangilal-an han *traumatic distress* ha mga ebakwet sugad han pirme lisang, kahadlukon ngan sobra nga pagdududa. An mao nga mga pangilal-an nakita ha mga ebakwet tikang ha Lanao del Norte nga nag-ebakwet ngadto ha Kauswagan ngan Kolambugan ha nasering nga probinsya ngan ha 17 nga iba pa nga *evacuation center* ha Ozamiz City ngan Tudela ha kasapit nga probinsya han Misamis Occidental. Sering han CHR, usa nga hinungdan hini amo an kahadlok han mga ebakwet

resulta han pagsamwak han mga impormasyon nga may-ada namangpangan nga aragway giutan han AFP ngan MILF.

Lisang liwat bisan an mga Moro nga naestar pa gihapon ha kada tagsa nira nga mga baryo. Sumala ha *Luwaran*, an *website* han MILF, damo nga residente han Barangay Inas ngan Dungguan ha Mlang, North Cotabato an nan-nipig ngan nangandam nga mag-ebakwet han tikangan han militar an pagsensus han mga residente nga Moro hadton Oktubre 18. Waray iginhatag nga hinungdan an mga sundalo ha ginhihimo nira nga pagsensus sanglit nagdududa an mga Moro ha lugar nga may-ada "ginluluto" an militar kontra ha ira.

Diri usahon an kahadlok nga inaabat han mga Moro ha nasering

nga lugar. Duha kaadlaw antes tikangan han mga sundalo an sensus ha Mlang, tulo nga sibilyan an ginsikmit han mga elemento han 40th IB ha Barangay Nalapaan ha kasapit nga bungto han Pikit, North Cotabato. An mga ginsikmit amo hira Rahman Suleik, anak niya nga hi Taurin Suleik ngan hi Tontongan Dilanggalen.

Ha kasapit nga probinsya han Maguindanao, unom katawo an basta nala gin-aresto ha Barangay Linantangan, Mamasapano hadton Oktubre 16 ngan pinan-ngastigo. Nakilal-an an mga biktima nga hira Aladin Lamalan, Ding Datuan, Alimudin Ibrahim, Daud Ibrahim, Binyamin Abdulatip ngan usa nga nagngangaran nga Kaumbo. Katin pa gihapon han militar an upat ha ira.

Masobra liwat 100 nga balay han mga sibilyan an ginsunog han mga sundalo ha Barangay Nimao ngan Andabit ha Datu Piang, Maguindanao hini nga kabutnga an Oktubre, sumala liwat ha *Luwaran*.

Mga ebakwet, ginutom han AFP. Samtang, kinukurian na ngani an mga ebakwet ginhihikawan pa han AFP han ginkikinahanglan nga ayuda. Ginpugngan han mga sundalo han 54th IB hadton Oktubre 23 an usa nga komboy han United Nations World Food Programme han umagi ini ha usa nga tsekpoynt ha Dapiawan, Datu Piang, Maguindanao nga may-ada dara nga pagkaon. Para kunta ini ha gatus-gatos nga pamilya nga ebakwet ha Libutan, Mamasapano, Maguindanao nga pinangugutom na tikang hira pagdid-an han mga sundalo nga magtrabaho ha ira mga umhanan ngan anihon an ira mga produkto. An mga naungod pagkadto ha ira mga umhanan in pinupusil. Duha nga parag-uma an nasamaran, sumala ha *Luwaran*. AB



Magpapadayon an mga imperyalista nga palisiya han US ilarum ni Obama

An masunod in ginkuha ha pahayag nga iginpagawas han Partido Komunista han Pilipinas hini nga Nobyembre 7.

Gin-eespiho han pagdaug ni Barack Obama ha eleksyon pampresidente ha US an hiluagan nga pagsalikway han katawhan Amerikano ha militarista ngan neokonserbatibo nga rehimen Bush. Hi Obama, nga kinandidato ilarum han Democratic Party, nagladawan ha kalugaringon komo kabaliskaran kuno han Republican nga hi George W. Bush. Ginsingabot niya an presente nga grabe ngan samwak nga diskontento han katawhan Amerikano ha rehimen Bush, labina ha atubangan han dagko nga pampolitika ngan panmilitar nga kapakyasan han US ha Iraq ngan Afghanistan ngan han pinaka-grabe nga pan-ekonomiya nga krisis ha US tikang hadton Great Depression.

Kundi anuman nga kaibhan nira Obama ngan Bush in nagin daparap pag-abot ha katindog nira hiunong ha nagpapadayon nga mga imperyalista nga palisiya han hegemonismo, pandambong ngan gerra. Iginpapakita han ira batakan nga pagkakapareho an panindugan nira hiunong hini nga ginrerepresentaran la nira an duha nga paksyon han monopolyo burgesyha han US.

An nahitatabo nga tikahilarum nga resesyon ngan desperasyon ha US ngan pankalibutan nga kapitalista nga sistema nagduduso ha US para pakusgon an imperyalista nga paniniyupi, pandambong ngan pananalumpigos ha kalugaringon nga nasud ngan mga bagakolonya hini, maghingyap hin iba pa nga erya han pagpapahiluag ngan maglansar hin mga gerra nga kontra-rebolusyon ngan gerra nga agresyon.

Padayon nga pahihiluagon han US an *military-industrial complex* hini, magpapakita hin kusog-militar ngan maglalansar hin dagko ngan gudti nga gerra para igduso an hegemonismo hini, pugngan an mga karibal hini nga ibanan an hiluag hini nga ginhadian ngan man-ngagaw hin bag-o nga mga merkado ngan teritoryo para mapakusog pa an pandambong ngan impluwensya han US. Magseserbe

hi Obama nga panibag-o la nga prinsipal nga instrumento hini ngatanan. Magseserbe nga mapan-owat nga pantahub ha agresyon ngan hegemonismo han imperyalismo nga US an populista nga panyakan ni Obama.

An tinuod pauru-utro na nga gin-eeendorso ni Obama an terorista nga gerra nga gintikangan ni Bush. Iginproponer niya an pagdugang hin 10,000 nga tropa ha Afghanistan ngan paglansar hin mga *unilateral strike* ha mga bawnderi hini ngan Pakistan, para kuno lanaton an al-Qaeda. Samtang nananawagan nga paulion na an mga tropa Amerikano tikang ha Iraq, ginkaklaro liwat niya nga kinahanglan kuno igpadayon han US an presensya militar hini didto para segruhon nga igpapatuman han papet nga gobyerno Iraqi an mga dikta

han US.

Hadton Hunyo, igin-undong ni Obama an padayon nga interbensyon militar ha Pilipinas han pagsering niya nga susuportahan niya an Balikatan *military exercises* subay ha "pagkakasangkay" han US ngan han neokolonyal nga kliyente nga estado hini. Hul-os niya nga ginbalewaray nga gintatahuban la han Balikatan an nagtitikadako nga permanente nga presensya militar ngan interbensyunismo han US ha Pilipinas. Nanawagan na hiya para ha pagpahiluag han mga programa para armas an militar han Pilipinas. Direkta ini nga pag-insulto ha gatus-gatos kayukot nga nabiktima na han Oplan Bantay Laya han rehimen Arroyo nga ginggigiyahan ngan ginsusuportahan han militar han US.

Hugot nga nananawagan an Partido Komunista han Pilipinas (PKP) ha katawhan Pilipino ngan Amerikano ngan ha mga katawhan han mga bagakolonya han US ngan iba nga mga nasud nga naato para ha nasyunal nga pagtatalwas ngan demokrasya nga diri magpaawat ha bag-o nga napili nga Amerikano nga presidente. May-ada kompyansa an PKP nga an klase nga trabahador ngan katawhan han kalibutan padayon nga magpupursige ha ira pakigbisog kontra ha imperyalismo ngan reaksyon, ngan para kab-uton an nasyunal ngan pankatilingban nga katalwasan, demokrasya ngan kauswagan. **AB**



Alternatibo nga komperensya han mga migrante, madinaugon nga nailansar

Madinaugon nga iginlansar han mga progresibo nga organisasyon tikang ha iba-iba nga nasud an syahan nga internasyunal nga komperensya hiunong ha mga isyu han mga migrante ngan *refugee*. Iginlansar an International Assembly of Migrants and Refugees (IAMR) komo alternatibo ha ikaduha nga Global Forum on Migration and Development (GFMD) nga ginhimo ha Pilipinas tikang Oktubre 28-30.

Madinaugon liwat an kampanya han mga grupo nga migrante, ha pangunguna han International Migrants Alliance, para ha "Zero Remittance Day" hadton Oktubre 29. Hini nga adlaw, ginlikyan han mga migrante nga magremit hin anuman nga kantidad komo protesta ha balayan ngan mga kampanya han GFMD.

Iginlansar an syahan nga porum han mga imperyalista nga nasud ngan institusyon sugad han World Bank hadton Hulyo 2007 para sulayan an presente nga kaayusan ngan palisiya han pagsingabot han rikuhanon nga mga nasud han barato nga kusog pagtrabaho. Gintatagan-rason ngan gin-aghat hini an dugang pa nga pankalibutan nga eksportasyon han mga trabahador tikang ha kablasanon nga nasud ha ngaran han "*global migration*."

Ginpapasamwak hini an panawagan nga "migrasyon para ha kauswagan" ngan "katungod ha migrasyon" para tagan-rason an pagsingabot han rikuhanon nga mga nasud ha barato ngan masinugtanon nga kusog-pagtrabaho tikang ha mga atrasado nga nasud. Ginpapagawas hini nga an pagpapadara hin mga remitans han mga migrante ha gintikangan nga mga nasud in alternatibo nga pamaagi ngadto ha kauswagan ngan solusyon ha kakurian. Gin-eengganyar liwat hini an paggamit ha mga remitans han mga migrante para pun-an an mga depisit ha badyet ngan pamabayad ha utang pan-gawas han mga atrasado nga nasud.

Pangilal-an han kawaray pulos hini, gintirok han GFMD an pinakadagko nga mga nasud nga nagtatalapas ha mga katungod han mga migrante. Waray ngani imbitara hini an mga organisasyon nga maiha na nga nakikigbisog para ha mga katungod ngan kaupayan han mga migrante.

Mas linandaw an kawaray pulos hini yana nga iginlansar ini ha Pilipinas ha pagdumara han rehimen Arroyo. Waray malabaw hini nga rehimen ha pagkagiyan ha mga remitans han mga migrante bisan pa ha karat-an ngan kahibangan nira ngan ira mga pamilya. Hul-os an pagkarawat han rehimen ha balayan han GFMD tungod kay

ginpapadig-on hini an *labor export policy* han estado ngan pagsarig ha mga remitans komo tagsalbar han bangkrap nga ekonomiya.

Ha luyo nga bahin, nagtirok ha IAMR an mga grupo nga migrante para pahitas-on an lebel han ira pagkaurusa ngan padig-unon an ira pakigbisog para ha ira mga katungod ngan kaupayan. Nagsarusaruy hira hin mga eksperyensya ha kada tagsa nga gintikangan nira nga nasud ngan mga nasud nga gintatrabahuan. Ginkondenar nira an balayan han GFMD ngan nananawagan ha mga gobyerno ha bug-os nga kalibutan nga tapuson na an pwersado nga migrasyon ngan seguruhon nga may-ada hira mga trabaho ha kada tagsa nira nga mga nasud. Iginpanawagan liwat nira an pagrespeto ha mga katungod han mga migrante ngan paggarantiya ha ira kaupayan. **AB**

Pilipinas, ikalima ha mga nasud nga nagugutom

IKALIMA an Pilipinas ha mga nasud nga nagugutom ha kalibutan, sumala ha World Food Survey han Gallup International-Voice of the People 2008. Ginpagawas an listahan han mga nagugutom nga nasud hini nga Nobyembre 4 katapos an pagsurbey ha 58,000 katawo tikang ha 55 nga nasud ha Asia, Africa, Latin America ngan Europe hadton Hunyo ngan Setyembre kasumpay han pagselebrar han World Food Day.

Sumala ha Gallup, 40% han mga Pilipino an nagsering nga agsub o usahay waray makaon o kulang ha pagkaon hini nga nakalabay nga 12 kabulan. Ginawas ha surbey nga pinakahitaas an tantos han kagutom ha nasud ha Metro Manila, an nasyunal nga kabisera kun diin apektado an tunga kamilyon kapamilya.

An mga nasud nga ginsurbey han Gallup kun diin pinakagrabe an kagutom amo an 1) Cameroon, 55%; 2) Pakistan, 53%; 3) Nigeria, 48%; 4) Peru, 42%; 5) Pilipinas, 40%; 6) Bolivia, 35%; 7) Guatemala, 35%; 8) Ghana, 32%; 9) Mexico, 23%; ngan 10) Russia, 23%.

Mas grabe pa an resulta han surbey han Gallup itanding ha makababaraka na nga resulta han surbey han Social Weather Stations kun diin ginawas nga 16.8% han katawhan Pilipino an nakaeksperyensya hin kagutom hini nga ikatulo nga kwarter han 2008.

Pagtahub ha iskandalo han "Euro Generals," ginkondenar

GINKONDENAR nira Rep. Satur Ocampo ngan Teodoro Casiño han Bayan Muna an desisyon ni Rep. Rodolfo Albano, tsirman han House Committee on Public Order and Safety, nga suspendiron an imbestigasyon ha pira nga higtaas nga opisyal han Philippine National Police (PNP) nga ginbansagan nga "Euro Generals." Waray abuyuni han mga progresibo nga magbaralaud an panraron ni Albano nga an kaso in gin-iimbestigahan na han PNP, National Police Commission (Napolcom) ngan Office of the Ombudsman.

Hira Ocampo ngan Casiño an nagproponer han House Resolution No. 843 nga nananawagan hin hul-os nga imbestigasyon ha walo nga opisyal han PNP nga inatender ha meting han Interpol ha Russia hadton Oktubre. Tipauli na hira hadton Oktubre 9 han blakan han mga pulis ha erport han St. Petersburg hi P/Dir. Elizeo de la Paz tungod ha dara niya nga ₱6.9 milyones (105,000 euros), sobra ha igintutugot han balaud. Usa kase-mana nga nakadetiner an heneral kaupod an iya asawa samtang ginpauli naman hira P/Dir. Silverio Alarcio, German Doria ngan Romeo Ricardo, Dep. Dir. General Emmanuel Carta ngan Ismael Rafanan, Chief Supt. Jaime Caringal ngan Supt. Elmer Pelobello.

Ha imbestigasyon han Senate Foreign Affairs Committee hadton Oktubre 23, diri mahiesplikar nira Interior Secretary Ronaldo Puno (presente liwat nga hepe han Napolcom) ngan Police Director General Jesus Verzosa kun kay ano nga sugad kadako an pabalon ha higtaas nga opisyal han PNP nga upod-upod pa an ira mga asawa. Sensilyo la ini nga kantidad itanding ha milyun-milyon nga pundo nga dabi ha iba pa nga mga iskandalo nga nadadabihan nira Arroyo ngan mga niyu-tiyo niya. Su-

gadman, sumala ha mga nag-iinsister nga imbestigahan an insidente, imoral ini ha atubangan han grabe nga kakurian han nasud.

Damo an iginhahatag nga mga rason nira Puno ngan Verzosa nga nagpapadaparap kundiri man nagtatahub la ha isyu. Sering nira, an dara-dara

nga kwarta in "*cash advance*," "*contingency fund*" ngan hini nga urhi, igparalit kuno hin mga kagamitan nga paniktik. Nagawas nga labot ha ₱6.9 milyones nga dara ni De la Paz, anay *comptroller* han PNP, may-ada pa "*contingency fund*" nga ₱2.192 milyones o ₱274,070 kada usa.

Impeachment kontra kan Arroyo, gin-endorso ni JDV

IGIN-ENDORSO ni anay Speaker Jose de Venecia Jr. an kaso nga *impeachment* kontra kan Gloria Arroyo hini nga Nobyembre 4. Ginpirmahan niya an mga papeles hini ha konsulada han San Francisco, California kaupod an mga Pilipino-Amerikano nga membro han Bayan-USA, Gabriela ngan National Alliance for Filipino Concerns. Pormal nga igsusubmitter an dokumento ha Lower House ha pag-abri han sesyon hini ha Nobyembre 10. Kadungan hini, iginpahayag ni De Venecia nga karuyag niya tumestigos ha kaso ngan igbuksas an ngatanan nga personal niya nga nahibabaruan hiunong ha mga kaso nga korapsyon nga nadadabihan ni Arroyo.

Iginsalawad an ikaupat nga kaso nga *impeachment* tikang 2004 hadton nakalabay nga Oktubre han anak ni De Venecia nga hi Joey, Atty. Harry Roque ngan Iloilo Vice Gov. Rolex Suplico. Nahiuana ini igendorso nira Rep. Satur Ocampo ngan Teddy Casiño han Bayan Muna ngan Rep. Liza Maza han Gabriela Women's Party. Kalakip ha reklamo an dayag nga pan-aabusos ha poder han presidente; mga pagtalapas ha konstitusyon; kaso nga korapsyon sugad han NBN-ZTE *deal*, Northrail Project ngan ₱728 milyones nga "*fertilizer scam*"; ngan mga ekstrahudisyal nga panmatay ngan iba pa nga pagtalapas ha tawhanon nga katungod.

Samtang, padayon nga nananawagan hira Archbishop Angel Lagdameo, presidente han Catholic Bishops' Conference of the Philippines (CBCP); Archbishop Oscar Cruz han Lingayen-Dagupan (Pangasinan); Bishop Emeritus Jose Sorra han Legaspi (Albay); Bishop Joel Baylon han Masbate; ngan Bishop Socrates Villegas han Balanga (Bataan) nga kinahanglan na saliwnan dayon an gobyerno Arroyo tungod ha grabe nga korapsyon hini.

Ginsuportahan han Bagong Alyansang Makabayan ngan mga patriyotiko ngan progresibo nga organisasyon an panawagan nira Lagdameo. Sinuporta liwat hi Archbishop Leonardo Legaspi han Nueva Caceres (Camarines Sur); an Bishop-Businessmen's Conference nga ginpamunuan ni Archbishop Antonio Ledesma han Cagayan de Oro; National Council of Churches in the Philippines; ngan Chief Justice Reynato Puno han Korte Suprema. Nakiusa liwat hi Rev. Eddie Villanueva han Jesus is Lord Movement nga nanawagan ha ngatanan nga lider han CBCP, mga singbahan nga Protestante ngan Evangelical, mga lider-relihiyoso nga Muslim ngan iba pa nga grupo nga relihiyoso nga mag-erestorya ngan magbalayan hin komon nga panindugan ngan kaangayan nga mga pitad.



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyon nga Waray
Tuig XXXIX Ihap 21
Nobyembre 7, 2008
www.philippinerevolution.net

Editorial

Korapsyon ha butnga han krisis

Ginurak utro an waray tubtuban nga korapsyon, kaduntan ngan pagmaniobra han rehimen Arroyo ha pagbuto na liwat han daan ngan bag-o nga dagko nga kaso hin korapsyon. Labaw nga nalandaw an isyu yana tungod ha iba-iba nga pamaagi nga ginhihimo hini para mapugngan an imbestigasyon kan anay Undersecretary of Agriculture Jocelyn "Jocjoc" Bolante. Hi Bolante, nangunguna nga opereytor ni Arroyo hadton 2004 ha pagkawat han ₱2.8 bilyones nga pundo han Ginintuang Masaganang Ani in ginpabalik diri pala maiha ha Pilipinas makalabay nga riwahan han US an ginhangyo niya nga *asylum* (pag-ayop) didto.

Waray ginkaibhan an mga maniobra yana han naghadadi nga rehimen ha paghunghong liwat han baba hini ha iba pa nga poyde tumestigos hiunong ha mga krimen nga nadadabihan han pamilya Arroyo. An desperado ngan krudo nga pag-atentar han rehimen Arroyo nga pugngan pagyakan hi Bolante ha Senado nagpapakita hin ura-ura nira nga kahadlok nga mabuksas ha publiko an nadadabihan nira nga mga anomaliya ngan krimen nga seguridad magpapalarab ha kangalas han katawhan.


Pursigido an

panalinguha han rehimen Arroyo nga igpabilin nga serrado an mga sekreto han anomaliya ha pundo han Ginintuang Masaganang Ani labina nga plano nira gamiton utro an sugad nga iskema ha tig-apike nga eleksyon ha 2010. Ha proposisyon nga badyet han rehimen para ha 2009, masobra ₱3.3 bilyones an igin-alotaga ni Arroyo para kuno ha panmalit ngan distribusyon ngahaw hin abono. Kaparte ini han ₱7 bilyones nga bag-o nga alokasyon para ha Ginintuang Masaganang Ani—ginhimo mismo an programa nga garatsan nira Arroyo ngan Bolante hadton 2004. Wala-tuo an iba pa nga larang nira Arroyo ngan han iya mga niyu-tiyo para mas pa nga malimas an karikuhan han nasud.

An paggrabe han korapsyon ni Arroyo hini nga urhi nga mga tuig han iya paghadadi kaparte han mga pangandam niya para dugang nga maseguro an pagpabilin niya ha poder lahos ha 2010.

Dugang nga nagtikahugot an iya pagkapyot ha poder ha ura-ura nga kabaraka nga pababatonon hiya ha iya mga sala ha katawhan.

Naru-napulo kabilyon kapesos nga pundo an gintitirok ni Arroyo komo pangandam ha aatubangon niya nga mga politikal nga agway kasagubay han panalinguha niya



Mga landaw hini nga isyu...

26 armas nakumpiska,
43 kaswalti han AFP-
PNP
PAYPAY 4

7 detenido nga kasama
ha Quezon, ipinuga han
BHB
PAYPAY 5

Imperyalismo nga US
ilarum kan Obama

PAYPAY 11

Mga instruksyon ha pag-iimprenta

1. An **ginsundan nga paypay**, nga eksakto nga kopya han paypay 1 gawas ha mas pus-aw an *masthead* o *logo* in para ha mga nagamit hin *mimeo machine* o nag-iimprenta ha pamaagi nga *v-type*. Gindesenyo ini para diri madali nga mahibang an istensil.

2. Pag-*print* ha istensil:

- a) Ha *print dialog*, i-check an **Print as image**
- b) Tanggalon an *check* ha **Shrink oversized pages to paper size**
- k) I-click an **Properties**
- d) I-click an **Advanced**
- e) Seguruhon nga naka-set ha **100%** an **Scaling**
- d) Ipadayon an pag-*print*

3. Gin-aaghat an mga kasama nga ipaabot ha patnugutan han *AB* an anuman nga problema kasumpay han pag-iimprenta pinaagi han *v-type*. Magpadara hin *email* ha *angbayan@yahoo.com*